

SAN PABLO CARTA E'SU FI'JNI CORINTO CHJAMBTEWE'SH JÏI

Dyus yacj fi'nzesaty Pablo fi'jni

1 ¹ Jesucristo jycaajnisia Pablo yaasetj, tyā'wē yūuwa'ja's Dyuscu jytjāas tyāa pa'ga. Naa carta's yacjtjē'j Timoteo yacj fi'jrra cajjatstju Dyus luuch Corinto chjambte pcjaacjena ūssawe'shtyi. Sa' tyāawe'shtyirráa méé, Acaya quiwesuwe'sh Dyus luuch jyucaysawe'sh jïi yā'jrra fi'jatstju wechana. ² I'cue'shtyi' Dyus cue'sh tata' pu'chjina vite' cue'shtyi jype'jsa Jesucristova, tyāa pa'ga Dyus yacjrráa mfi'nzewe.

Pablo pytjaa ñuste fi'nzeni

³ Áchja' Dyusa's wala wechawa'lj ji'ptja'w, tyā' cue'shtyi jype'jsa Jesucristo Tata', tyāasac cue'shtyi's peeygājrra bagachteva cviisha'jna nes yu'. ⁴ Cue'shtyi' quijquij ñuswa'lj en pa'tjeva, cviisha'ja'c Dyusa', atsa' tyāa ma'wēga cue'shtyi's cviisha'lj, tyā'wēy cue'shva vitesa ñusna fi'nzesaty cviisha'cjancu tyā'wē yū'. ⁵ Cristo's nwēese'pja'ga ma'wēga seena' ñuswa'lj en pa'ja', nava Cristo pu'chte', tyā'wēyrráatja'w cviisha'jnisa'sva jypa'ga'. ⁶ Tyā'wē i'cue'sh ewte neeyūuwa'ja's jypa'garra cviisha'jni yuucajntja'w cue'sha' ñuste fi'nze'. Dyusa' cue'shtyi cviisha'jrra', i'cue'shtyiva tyā'wēy cviisha'jrra ewte nviituna, cyaj i'cue'sha' wantāyya' ājane'cue cue'shtyi ñuswa'lj en pa'ja'c tyā'wēysa i'cue'shtyiva pa'tjeva. ⁷ I'cue'sha' ñuswa'lj ena'sa' jypa'garra', Dyus cviisha'jni'sva tyā'wēyrráa jypa'gawa'jsa i'cue tyā'wē yūuwa'ja's ew jii'tja'w.

⁸ Asia quiwete ma'wētca seena' ñussa's ji'pju tyā'sna miijajcywe, yacjtjē'ljwe'sh. Cyteea' iimejc seena' wala ñuswa'lj en pa'j, atsa' peena yu' ityī fi'nzewa'lj ji'pmeene'tca sūju'tj wantāyya' chjāchjameerra. ⁹ Áchja' uu en yujna sūju'rráatj. Nava naa quiwete ityī fi'nzeni's yajcyméé Dyus ityī

vit-sana yaacyajnráac tyā'wē yuu. ¹⁰ Tyacue seena' uuwa'tjerráa yā'j fi'nzetsteva, Dyusa' andya's nwe'wec, sa' āchva nwe'wena nes tyā'wē. ¹¹ Cue'sh pa'gate i'cue'sha' Dyus yacj puuty we'wepa'ga tyā'wē nwe'wena nes yuuna sūjna Dyusrráanatj yaaqui'. Sa' nasa maanzcuéesava cue'sh pa'gate Dyus yacj puuty we'wete', Dyusa' cue'shtyi nwe'wena atsa' tyāawe'sha' Dyusa's wechaatyna.

Pablo' quīj yuurraga Corinton u'jmée

¹² Isatj we'we', Dyusa's atsesawe'sh yacjva ew yuurráatj yūuna fi'nze, sa' i'cue'sh yacj yu' wejytju tyā'wē ewrráa fi'nze sūjna yuurráac úsutje', tyāa pa'gatj wechá'. Tya'wē ew yūuna fi'nzewa'ja's Dyuscu pu'ch, atsa' peecy úsujrráa chjächja yajcyrra tyā'wē ew fi'nzemeetj. ¹³ Andya' i'cue'shtyi carta fi'jrra', íshiiya' sūjrra fiy yajcyna fi'jmeetj, atsa' i'cue'sha' cuj jwend yaacynuwe. ¹⁴ I'cue'sh maafí yu' andy caapiya'jni' isasateva jiyui'cue na' ew jiyuna mjyā'jwe. Tyā'wē ew jiyurra', cue'shtyi jype'jsa Jesus quíjje', i'cue'sha' wētwe't yaaquine'cue andy i'cue'shtyi ew yūupa'ga, atsa' andyva wētwe't yaaqui'nja i'cue'sh ew fi'nzepa'ga.

¹⁵ Tyā'wē andy caapiya'jni's ew jiisai'cue tyāa pa'ga andya' e'nz us pa'jya' yuwe'nja sūjna yaacynitj ji'pju' i'cue'sh yacj wechana puuty uyya'. ¹⁶ Nyafýte' Macedonia quiwen u'juetsrra iipa'j u'jue'nja. Sa' Macedoniajū qui' shawendna yujrra qui' pa'ja'nja sūju'tj. Atsa' cytee úsrra Judea quiwen u'juetste', i'cue'sha' andya's pu'chjine'cue sūjna yaacynitj ji'pju'. ¹⁷ Ew ús yajcymey fi'ja'ne' cytey yu'nja jírrava cytey yu'tsme', Dyusa's jiimeesa na'wē, sūjuv'á'cue. ¹⁸ Nava Dyusa' jiia' andya' e'nz jwend we'we'tsmeetj i'cue'shtyi's. ¹⁹ Tyā'wē yūucajmení Dyus Nchi'c Jesucristo' bagachte yujva e'nz jwend we'wemée isasarrá'scu we'we', atsa' cue'sha' tyajy we'weni'stja'w pta'shi' i'cue'sh cshavyte Silvano, Timoteo vite' andy yā'jrra. ²⁰ Na'wē Dyusa' quīj yūuwa'ja'sva puuty we'wec tyā'sa' Cristo yuurráac jyuca cytey yuu, Dyus puuty we'weni's caavya'ja'jna. Tyāa pa'gatja'w Dyusa' bagachteva cytey yuusa' jīna tuutje'je'. ²¹ Tyāasac Dyusa' andyna vite' i'cue'shtyiva pu'ch isasarrá's cytey yuuna fi'nzecajj, Cristo yuurrá's selpiina fi'nzepa'ga. ²² Sa' Dyusa' cue'shtyi tyjityjrra tyajy Espiritu's peescu, Dyus jīi yu'sa' quíjnavá jyuca tyā'wērrarráa jypa'gawa'jsa i'cue jīna caajiyu'jna.

²³ Na'wē Corinton u'jue'nja sūjrrava, cytey yuunimeetj. Nava tyāa yu' wejyva i'cue'shtyi juuna' we'wena úsya'meetj tyā'wē yūu. Andy úuste íshiiarra tyā'jī'tsmeetj tyā'sa' Dyusa' jiia'. ²⁴ I'cue'shtyi úusacharra tyā'wē yujmée yuumeetj, wejyva quimva juuna' we'wemeete i'cue'sh pwe'shrráa ewcuéerraj yuwe's pjeu'cjantju úytjasna tyā'wē yūu. Andy tyā'wē juuna' yūucajmení i'cue'sha' Dyus yacj yu' chjächja yā'j úsi'cue.

2 ¹ Atsa' tyā'wē juuna' we'weya'rráa yu' u'jmeete ewna sūjnatj yajcy. ² Andya's i'cue'sh yuurráa wētwe't caayaqui'jwa'jsa i'cue naapcach

tyā'wē andya' i'cue'shtyi juuna' we'werra cyūusu'tje!, andya's ¿quim wēt'wēt caayaqui'jicy? sūjnatj yajcy. ³Tyāasatj i'cue'shtyi cyūusu'jna pa'l'ya'mée cartarráa fi'l'rra caaj, i'cue'sh tyā'wē ājmée yūuna ūspa'ga andya' wechana pa'l'japcachte, űuswa'l'rráa ji'pju'nja sūjnatj yajcy. Naasáa andy wechana pa'tje yuurráa i'cue'shva tyā'wēy wechana ūswa'l'ja's ji'pjune'cue sūju'tj. ⁴Iiméj wala cuj yajcyna űusrra ū'nenatj carta's fi'l', nava i'cue'shtyi juuna' yuurra cyūusu'l'ya' sūjna ūsacharra tyā'wē yūumeetj. Andya' i'cue'sh tyā'wē ājmée yūupa'ga iiméj wala peeygájrarráatj tyā'wē ū'nena fi'l'.

Canzh pcal yūusa's peltunāyrra cviisha'cjan yu'cypejni

⁵Nava tyā'wē ājmée yūusa' andyrráana tyā'wē cyūusu'l'jme!, i'cue'shtyiva jyucaysatycu tyā'wē cyūusu'l', tyā'wē canzh yūurra. (Tyā'wē canzhcu yūu jīnarráatj we'we' jyuca yu' pta'shya'mée.) ⁶I'cue'sh puuty we'werra castigāywa'l'ja's viti'cue tyā' cytee pa'l'rráa ewna, jwee yu' tjaacue yuumée. ⁷Wejyva āchja' peltunāyrra mecviisha'l'jwe, tyā'wēme' wejy tjaacue wala űusrra isa jyucate vituwe'shte. ⁸Tyāa pa'gatj i'cue'shtyi neewe'we' peeygāawa'l'ja's qui' ji'pjucajn tyā'wē ājmée yūusa's. ⁹Juuna' yuucajn i'cue'shtyi fi'tj, nava andy jycaajni's aan cytey nwēese'l'jetyna sūjrrarráatj jiyuya' tyā'wē yūu. ¹⁰Āchja' i'cue'sha' tyā'wē ājmée yūusa's quij yūuni'sva mpeltunaīwe, andyva peltunāytju peltunāywa'l' ūsu'c tyā'sa' Cristo dyi'pte, i'cue'sh pwe'sh puiimée ew fi'nzecajn. ¹¹Tyā'wēme!, echtjē'l'ja' wala yuj jiia' cue'shtyi caypumba'l'rra cnaywa'l'ja's tyā'sa' jii'tja'w.

Troaste Tito's uymeerra, Pablo wala űus yaacyni

¹²Cristo nwe'weni's pta'shya' Troas chjambte pa'tje!, Cristo's selpiina ūswa'l' en wala yuj ewsa vyaac. ¹³Nava cue'sh yacjtjē'l' Tito's uymeerra wala cuj yajcytju, tyāasatj tyajū casejrra Macedonian ul'.

Cristo yacja' quijteva jyucac ewrráa ya'fi'nze'

¹⁴Nava Dyusa' pu'chji'c Cristo Jesus yacj fi'nzete!, quijteva ewrráa caafi'nze'l'jna, atsa' tyajy yuwe's mteeva caajiyul'jwa'l'satja'w, maa maava jiyuna jyā'l'cjan. ¹⁵Tyāa pa'gatey cue'sha' Dyusa's jiiyā'l'ja's vite ewte neeyūuwa'l'ja's ma'ty yuu meerra' vituwa'l'ja's ma'ty yuu nava caajiyul'jwa'l'satja'w Dyus yacj fi'nzeni's. ¹⁶Tyā'wē yā'tje!, ¿quim tyā'wē Dyus yuwe's caajiyul'jya' ul'jwa'l'ja's ūstyqui? Vituwa'l'ja's yacj yu', Dyus yacj fi'nzeni' wala yuj ewmée tjenguna, naapcachja' ewte neeyūuwa'l'ja's yacja' iiméj seena' zhichcuesa yuuna. ¹⁷Maafía' Dyus yuwe's yu'ptjerrra fityti pta'shna pecūju!. Nava cue'sha' tyā'wē yū'tsmeetja'w, sa' Dyus yuwe's vyuu pa'gava pta'shna ūsmeetja'w. Tyā'wē yūuya'méefi, cue'sha' Dyus caajnisatja'w, Cristo's selpisáa. Tyāasatja'w īshiimée ūusuj jyuca isasarrá's we'we' Dyus dyi'pte.

Nwe'wewa'ja's u'se pjeu'jrra Dyus nviitnisa

3 ¹Tyā'wē we'wena fi'jrra', peequírráa ewsatj jīnac we'we' ¿sūjuvácue? Meerra' viteva na'wēty neewe'wenisa carta jyūrra pa'ja' atsa' tyāava tyā'wēy jyūrra pa'jwa'l j'i'pja' ¿sūjuvácue? Meerrava i'cue'sh neewe'wenisa carta cutyi'jwa'l j'i'pja' ¿sūjuvácue? ²Andya' tyā'wē vitesa neewe'wenisa carta jyūrra pa'jwa'l j'i'pjmeetj, tyāa pa'gatey andyna neewe'wewa'jsa' i'cue'shírráa i'cue. Tyāasa andy mjīini's maatyva caajiyu'jwa'jsa' i'cue'shi'cue, carta na'wēsa. ³Cue'shtyi neewe'wesa' Cristo', tyāasac tyajy cuseju yuu fi'jrra carta ūs, atsa' tyāa carta' i'cue'shi'cue. Nava tyāa carta' tintaju fi'jni yuume'. Dyus Espiritujuc fi'jni yuu, sa' cuet taplateva fi'jni yuumée, nasaa ūstec fi'jni neeyūu.

⁴Cristo pu'chpa'ga, Dyusa's selpiiya' ājātj, tyāasatj íshimée isa we'we'. ⁵Dyusa's selpiiya' ājānisa' peecyrráa tyā'wē ya'ājā'tsme'. Tyā'sa' Dyus pu'chtec tyā'wē ya'ājā'. ⁶Dyusa' naa ensu nasaty nwe'weya' ājāwa'ja's pjeu'jrra nvijtcu tyā' leya's nwēese'jwa'l yu'tsme', naasáa Dyus Espiritu's yuurráa ūuste jypa'gawa'cj yu', atsa' tyā'sna pta'shya' ājāwa'ja'scu Dyusa' andya's pu'ch. Ley fi'jrra nviitnisa' uuwa'tjerráac vit, naapcachja' Dyus Espiritu' Dyus yacj fi'nzewa'ja'scu vit.

⁷⁻⁸Moises ley cuet taplate fi'jnisa's jypa'ga enterráa yujva seena' yuj zhichcue eena' cweetjcu. Tyāa pa'ga Moises dyi'pva tyā'wēyycu eena' cweetjna neeyūu. Atsa' Israelwe'sha' Moises dyi'pte tjengya' ājāmeeta', Moises dyi'pa' seena' eena' cweetjpa'ga. Nava tujndtujndrraj ūchjana u'cj. Tyā'wē uuwa'tjerráa vit-sa leya's jypa'ga enterráa yujva tyā'wē seena' zhichcue eena' cweetjrra', Dyus Espiritu caapiya'jni en yu' wejy tjaacue zhichcuesa'. ⁹Tyā'wē yuuwesa i'cue jīna pta'shsa leya's jypa'ga enterráa yujva seena' zhichcue yuuc atsa' cue'shtyi yuuwemée ewte nviitwa'jsa's pta'shni en yu' wejycu tjaacue zhichcuesa yu'. ¹⁰Ley jypa'ga ente' tyā'wē yuj seena' zhichcuesa yuuc. Nava āchj naa ensu tjaacue zhichcuesa vyaac tyāa yacj caaja'nda'tje yu', nyafiiwe'sha' seelpimeesac yuu. ¹¹Tyachmeerráa selpiwa'jsa pa'l enterráa yujva zhichcue yuurra', bagachte yujva psumée selpiwa'l en yu' wejy tjaacue zhichcuesa'.

¹²Tyā'wē bagachte yujva psumée selpiwa'ja's jiirratj āate pta'shna we'we'. ¹³Andya' Moises na'wē yūutsmeetj. Moisesa' tyachmeerráa eena' cweetjnisa ūchjatste Israelwe'sh uywe'shte dyi'pa's yaapjcu. ¹⁴Sa' Moisesa' quij yuucajn tyā'wē yaapjteva Israelwe'sha' jiyumeeta'. Sa' āchj pa'jva apjni ūsna jiyucajmen, tyāa pa'gaty tyāa leya's lēeyrrava jiyu'tsmée. Atsa' tyāa apjnisa's Cristo's pi'cyrra yuurráa pjaandeya' ya'ājana. ¹⁵Āchpcach apjni ūsna, Moises fi'jnity lēeyrrava jiyucajmen. ¹⁶Atsa' maava Jesucristo tashte utyaate yuurráac tyāa apjnisa' pjaandeni yu' jiyucajn. ¹⁷Cue'shtyi jype'jsa' Dyus Espiritu', atsa' tyāa yacj ūste yu', jiyuwa'ja's wej yujva ya'ljypumbameena. ¹⁸Tyāa pa'gatey cue'sha' dyi'pa's yaapjni j'i'pjmeetja'w,

tyāa pa'gac Dyus cweetjni' cue'sh dyi'pte speeju na'wē eena' cweetjya' ājā'. Atsa' Dyus Espiritu pu'chte', jyucaysa jwee írráatja'w Cristo ma'wēsate!, tyāa na'wēy fi'nzena u'jya' āja!, cue'shtyi jype'ljsa Dyus Espiritu' tyā'wē yūuwa'ja'scu pu'chji' naa pa'ga.

4 ¹Ājmeecueteva Dyuscu neewe'werra nvijt tyajy tashte selpiwa'ja's, cyajtja'w chjāchja yajcyna fi'nze!. ²Cue'sha' jyuca nvijttja'w paatste ewmēe yūuna íshiina fi'nzeni's. Tyāasa ewmēe yajcyrra Dyus yuwe's yu'ptjejna ūsmeetja'w. Isasarráanatja'w we'we', atsa' Dyus dyi'pte íshijja'tsmeene' sūjnarráa miijajcywe jyucaysa. ³Nava ewte nviitwa'ljsa Dyus yuwe's pta'shi'tja'w tyā'sa' maaí yu' achamēe vāa ew jiyutyna, nava tyāa yu' vituwa'ljsa yacjrrāa tyā'wē yūuna. ⁴Tyā'wē yūucajní naa quiwete jycaajna ūssa echtjē'ja' tyāawe'sh ūus yaacyni's jyuca apjcu, Jesucristo Dyus na'wēysa caapiya'jni zhichcuesa's jiyucajmen. ⁵Sa' cue'shtyi nwēese'j jytjāasrra pta'shi'tsmeetja'w, wejyva cue'shtyi nwe'wesa Jesucristo yurrá's nwēese'jwa'ja' jīnarráatja'w pta'shi', cue'sha' naasáa i'cue'shtyi selpiisarráatja'w, Jesusa's nwēese'ljsa. ⁶Dyusa' nyafiitey qui juyva meetey chji'ndy walate eena'sa's caacj cweetjcajn tyāa Dyusírraac cue'sh ūusteva eena' caacweetjē'j, Jesucristo' Dyusírráateva jiyucajn.

Dyusa' pu'chjina sūjnarráa fi'nzeni

⁷Dyusa' cue'shtyi's neewe'wec Cristo caapiya'jni tyacue seena' zhichcuesa's. Nava cue'sha' tyā'wē seena' zhichcuesa's we'weya' yu' ājawa'jmeesatja'w, atsa' tyā'wē cue'sh yu' ājameete írráac Dyusrrarráa pu'chji!. ⁸Tyāasaírráac tjēyte fi'nzewa'lj iiméj wala pa'tjeva, tyajūva casejya' ājawa'ja's pu'chji!. Atsa' űuswa'lj en pa'tjeva, Dyusa' pu'chjina sūjwa'lj yurrá'stja'w jī'pju!. ⁹Naa quiwetewe'sh yu' ajtseteva, Dyus yu' atseni fi'nze'tsmeetja'w. Pcyuuni fi'nzerrava, jyucate yu' vituni yu'tsmeetja'w. ¹⁰Jesusva ma'wēga uu tyāa na'wēy uusáa na'wē yuuwa'lj jī'ptja'w, ityī yuusáa Cristo pu'chni's jypa'garra tyāa na'wē yurráa fi'nzeya!. ¹¹Nava cue'sha' naa quiwete nee fi'nze'tsrra!, bagachteva icj wēenirráatja'w fi'nze!, Jesus caapiya'jni's pta'shpa'ga. Tyāa pa'gac ityī yuusáa Cristo pu'chni' vyaana nes yu!. ¹²Tyāasatja'w cue'sha' icj wēenirrá's jypa'gana fi'nze!, naapcachja' i'cue'sha' Dyus yacj fi'nzewa'ja's i'cue jypa'gana fi'nze!.

¹³Dyus libru'te' na'ljīnac we'we': Dyus pu'chwa'ja's jii'tj yu', tyāasatj tyā'wē we'we' jī'c. Atsa' cue'shva tyā'wēy Dyus pu'chwa'ja's ew jii'tja'w, tyāasatja'w pta'shi!. ¹⁴Sa' Dyusa' cue'shtyi na'wē yūuwa'ja'sva jii'tja'w: Jesus uuteva qui' ityī vitcu, sa' cue'shtyiva tyā'wēy qui' ityī vituna. Tyā'wē yūurra tyajy ūsnite pe'ljna uljuena pety i'cue'sh yā'ljrra Jesus yacj fi'nzepa'ga. ¹⁵Cue'sha' pcyuuni űustetja'w fi'nze!, nava i'cue'sh ewte fi'nzewa'ja's uycajtntja'w tyā'wē yu', cyaj maanzcuēesava Dyus peeygāani's jypa'garra!, cyaanzcuēesay Dyusa's wechana tuutjeljetyna.

¹⁶ Tyāasatja'w cue'sha' bagachteva ūucjmée Dyusrrá's chjächja yaaqui'. Macue cue'sh cacuete chjächjasa yu' ptsuuna u'ljuetsteva, Dyus yacj wechana fi'nzewa'lj yu' jweeírráac een isa chjächja ya'fi'nze'. ¹⁷ Tyāa pa'gatey naa quiwete ñuste fi'nzenisa' dundtewe'shrráa, tyachmey scjēwwa'jsa'. Atsa' tyāa scjēwniijū' bagachte yujva scjēwwa'jsamée iiméj ewsa'scu cielute ya'ji'pju'. ¹⁸ Naa quiwetewe'sha's yaacywa'lj ji'pjmeetja'w, cielutewe'shrrá's yaacywa'lj ji'ptja'w. Tyāa pa'gatey naa quiwetewe'sha' tyachmey scjēwwa'jsata', nava cielutewe'sha' bagachte yujva scjēwwa'jsa meeta'.

5 ¹ Tyajírráa cue'sha' ew jiitja'w naa quiwete ityí fi'nzenisa cacue ptsuuteva, vite cacue bagachte yujva ptsuwa'jsamée tjaacue ewsa cue'sh jii pjeu'jni ji'pja' Dyusa' cielute. Tyā' ptsuwa'jsa naa quiwetewe'sh na'wēsame'. ² Tyajtja'w naa cacuete ñusna nee ityí fi'nzetsrra', dund cielute ūswa'lj cacue's jypa'gavatsa' sūjna yaaqui'. ³ Tyājū yuurra', cacue ji'pjímée yu' ūsmée, cacue ji'pj neeyū'nja'w. ⁴ Naa cacuete nee ityí fi'nzetsrra', ñus yajcynatja'w fi'nze'. Nava naa cacue iishsa's ajtserra dund uuvatsa' sūjrra tyā'wē ñus yaaqui'tsmeetja'w, naasáa naa cacue's dund pju'se'jni yuute', cue'sh cacue ptsuwa'jsarrava cytee u'se yuuna pa'jana sūjrratja'w tyā'wē yūuwa'ja's dund jytjáasu'. ⁵ Tyā'wē yūuwa'ja's Dyuscu pjeu'lj, tyāasac tyā'wē yūuwa'ja's jypa'gawa'jsa yuji'cue jirra nyafyte tyajj Espiritu's cjuē'y ūs.

⁶ Pejca tyā'wē yūuwa'jsa yujtja'w, nava naa cacue yacj nee ityí ūsí yu', cielute cue'shtyi jype'jsa Jesucristo ūsna cytee āchjii yu' ūsya' ājā'tsmeetja'w. ⁷ Nava pejca cytee pa'ljwa'jsa yujtja'w sūjnarráatja'w fi'nze'. ⁸ Tyā'wē cue'shtyi jype'jsa tashte pa'ljwa'ja's jiitja'w, tyāasatja'w naa cacuete ityí fi'nzeni's nvijtrra tyāa yacj ūsya' u'lj wēje'. ⁹ Tyāasa naa cacue yacj nee ūsí mtja'w yuu, cjīmeerra' naa cacue's ji'pjímée yā'ljmtja'w yuu, nava Cristo dyi'pte ew fi'nzewa'ja's yuurráatja'w pa'pchu'. ¹⁰ Tyā'wē jypa'yacymeete', Cristo tashte jyucaysa cuutya'lnisa yu'nja'w. Naa quiwete ew mtja'w selpiisáa yuu, meerra' ewmée mtja'w selpiisáa yuu nava teehsa na'wērraj peecy selpiini's jypa'gawa'jsatja'w.

Dyus yacj yuuwemée neeyūuni's pta'shni

¹¹ Tyā'wē Cristo tashte utyaarra ma'wē selpiisarrava tyā'sa' paswa'lj ji'ptja'w, tyāasatj Dyusna yuurráa selpi' i'cue'sh dyi'pte. Andy ma'wē selpini'sva Dyusa' jiiyā'ja', atsa' i'cue'shva andy quīj yūusatava jiyuvatsa' ewna sūju'tj. ¹² Andya' tjaacue ew selpisaatj jīna iivejch we'wena ūsmeetj, naasáa andy ew selpini's i'cue'sh yaacyajnráatj tyā'jī'. Tyā'wē andy ew selpini's i'cue'sha' jii ūsrra írráa, andyna ewmée nuywe'wesawe'shtyi' pasya' ājāne'cue. ¹³ Andya' luucu na'wē vántca we'we', nava tyā' Dyus jī'. Atsa' luucu na'wēmée we'werra yu', i'cue'shtyi ne'tca we'we' jiyucajn. ¹⁴ Cristo' jyucaysa pa'gate peeygājrra

uuc, atsa' tyāa peeygāani's yajcyte', tyā'sna selpiwa'lj yuurráac caseje', na'wē yajcyna: ¹⁵Cristo' jyucaysa pa'gate uupa'ga, maava tyāa yacj ūssa' jyucaysa uusāa na'wēsajta'w yuu sūjna. Atsa' tyāa yacj fi'nzesawe'sha' ma'wēva fi'nzemée, wejyva na'wē tyāawe'sh pa'gate uurra qui' ityī yuuc tyā'srráana selpiina fi'nzewa'jsata'.

¹⁶Tyāa pa'ga āchjūyā'ja' vite ma'wēsateva tyāaty tjengna ūsterráa yujva yaacywa'lj ji'pjmeetja'w. Andya' nyaffi yu' wala ne'tca jypumba, tyāasaítj Cristo's naa quiwete cue'sh na'wēysaírrá' sūjna yaacyni ji'pju'. Nava āchja' tyā'wē yaacyni's yu'ptjejwa'ja', ¹⁷tyāa pa'gatey maava Cristo tashte utyasá' jyuca yu'ptjejnic yu'. Nyaffi yajcyna fi'nzeni's nvijtrra, u'sesarrarráac ya'jypa'ga'.

¹⁸Tyā'wē u'se yuuwa'ja's Dyusrrarráac vitu', tyāasac tyāa yacj ew fi'nzewa'ja'sva vitu', cue'sh pa'gate Cristo's uuwa'lj vitrra. Dyusa' tyā'wē yūurrac andya's neewe'werra nvijt, tyāa yacj ew fi'nzewa'ja's jyucaysaty pta'shcajn. ¹⁹Ew jiyute yu', Dyusa' naa quiwete nasaa pcaltyi jyuca peltunāyrra tyāa yacj ew fi'nzewa'ja's pjeu'jya'c tyā'wē Cristo's uuwa'lj vitna ūsu'. Dyus tyā'wē yūuni's pta'shcajncu andya's neewe'werra nvijt. ²⁰Tyāa pa'ga andya' Cristo nwe'weni's pta'shya' Dyus caajni yujtj. Tyāasatj Dyus yuu we'we'ts na'wē andya' i'cue'shtyi jycaaja' na'ljina: Dyus tashte mutyaawe, tyāa yacj fi'nzeya'. ²¹Cristo' quīj pcal yujva ji'pju'tsme', nava cue'sh ewmeesapa'garráa tyāac Dyus castigo's jypa'ga. Atsa' cue'sha' Cristo's jypa'garra', ewmeesarrava Dyus dyi'pte yuuwemeesa yuucajncu tyā'wē yūu.

6 ¹Tyāasa andya' Dyusna selpisaatj. Tyāa pa'gatj i'cue'shtyi yu'cypeje': Dyus peeygāani's jiyuyā'jrra', wa'lmée jypa'gacajn. ²Dyus peeygāawa'lj ena's na'wēc pta'shi' Dyus libroute:

Ju'ngu yuuwa'lj en ājte', wēse'tj,

Sa' pu'chtju ewte neeyūucajn jī'c.

Tyāa pa'ga āchja' tyā'wē yūuwa'lj en ājc, atsa' naa ensu' ewte neeyūuwa'lj ente ūstja'w.

³Andy mjiini's ewmée nuywe'wecajmen, quim yujtyva ewmée yūuna ūsmeetj. ⁴Macue wala pytjaa yuuna, wantāyna, quijteva pejiina, tjēyte fi'nzena ūsrrava, Dyusna selpiinisarrá'stju caavya'ja'jna fi'nze'. ⁵Andya's pāparra carcelte tyaaajnisatj yuu. Wēeshuna pcyuuni wala tjēyte fi'nze'tj. Chjāchja mjiiweete deewa'lj en yujva uymée, wēenatj fi'nze'. ⁶Nava Dyus dyi'pte na'wē ew yūunirrá'stju caavya'ja'jna fi'nze': atsewe'wetsteva ca'tu yu' ew yūuna, Dyus Espiritu andy yacj fi'nzeni's caajiyu'jna, ūusuj jyuca peeygāani's caavya'ja'jna, ⁷isasarrá's pta'shna, Dyus pu'chni's caavya'ja'jna. Sa' atsewe'wesaty paswa'lj ma'c yuu meerra' pcyuutste paswa'lj ma'c yuu nava quijteva ewrráa paswa'ja'srráatj yajcyna fi'nze'. ⁸Sa' qui'quinte' wendynitj fi'nze', nava maa enteya' atsenitj fi'nze'. Vite ensuy yu' ew we'wena qui' ewmée we'wenitj fi'nze'. Qui'quinteya'

ĩshiisa' jĩna nuywe'weni, nava maa enteya' isasa's pta'shsa' jĩna we'wenitj fi'nze'. ⁹Maa enteya' nasa jiyunimeesa tjastyi andya's we'we', nava maa entey yu', andya's wala namicu na'wěty ew we'we'. Maa enteya' uuwa'tjerráa yā'tj fi'nze', nava u'ts yu' meetj. Wala pcyuuni yuurrava, icjni yu' yu'tsmeetj. ¹⁰Macue wala cyūusu'jni ūsrrava, wechanatj fi'nze'. Naa quiwete quĩjva ji'pjmeesarrava, maanzcuēesatyva ji'pjsatj vitu' Dyus dyi'pte. Macue ji'pjmeesarrava, quĩj yujva peeji yu' meetj fi'nze'.

¹¹Corintote yacjtjē'jwe'shtyi ĩshiirra tyā'jĩ'tsmeetj, andy ūuste ūusutjeni's jyuca ātatetj we'we'. ¹²I'cue'sh yu' andya's atseyaaqui'ne'cue, nava andya' ca'tu yu' i'cue'shtyi' atseyaaqui'tsmeetj. ¹³Neya' luuchtyi's ma'wēga peeygājna we'we', andyva i'cue'shtyi' tyā'wěytju peeygājna we'we'. I'cue'sh ūus yaacyni's paatsterráa ji'pjumée āate we'wecajntju andy ūus yaacyni's āate we'we'.

Dyus ĩtyisa ūswa'jrráatja'w

¹⁴Dyusa's jiimeesawe'sh yacja' ptamuwa'jme'. Tyā'wēme' cyteerraj tyāawe'sh na'wěy yūuna fi'nzeya' ājameene'cue. Ewsa' ewmeesa yacj fi'nzewa'jsame'. Eena'sa' chji'ndysa yacj cyteerraj ūsya' ewu'tsmeeta'. ¹⁵Cristo' echtjē'j yacja' puuty utya'tsmeeta'. Dyusa's jiisa' Dyusa's jiimeesa fi'nzenite fi'nzewa'jme'. ¹⁶Dyus ūsnite' Dyus ĩtyīmeesa' ūswa'j ji'pjmeeta'. I'cue'sha' Dyus ĩtyisa ūswa'jrráa i'cue. Tyajíc Dyusa' na'jĩna we'we:

Andya' tyāawe'sh Dyus yu'nja,

Tyāawe'sh ūuste fi'nzewa'jsa.

Atsa' tyāawe'sha' andy luuch yuutyna jĩ'c.

¹⁷Sa' vite ajcjēva na'jĩnac we'we:

Ewmeesawe'sh cshavyu casejrra utyaanuwe,

Sa' ewmeesa's jya'ndynuwe.

¹⁸Tyā'wē yūute', i'cue'shtyi andy jypa'garra

Ney na'wē yu'nja.

Atsa' i'cue'sha' andy luuch yuune'cue jĩ'c quĩjteva jyuca ājāsa Dyusa'.

7 ¹Dyusa' tyā'wē ew fi'nzewa'ja'scu jycaaja'. Tyāa pa'ga, yacjtjē'jwe'sh, wala jypa'yacy fi'nzewa'j ji'ptja'w, cue'sh cacue ma'c yuu meerra' cue'sh ūus ma'c yuu nava suw'wa'jsa yu'sa' ca'gal'jwa'j ji'pjmeetja'w. Dyusrráana yajcy na jypa'yacy fi'nzewa'j ji'ptja'w.

Corintotewe'sh ewmée yūunijū shawendni

²Andya's atseyaacynuwe. Andya' quim yujtyva ĩshiina caypumba'jna ewmée yūuna ūsmeetj. ³Atsa' i'cue'shrráa yuuwesa i'cue jĩrra tyā'jĩ'tsmeetj. Tyā'wē yajcymeerraítj andy peeygāanisa i'cue, tyāasa andy yacj ja'ndarra'j fi'nzena tyutemey uuwa'jsatja'w jĩnatj we'we. ⁴Macue seena' nūswa'j ente ūsrrava, i'cue'shtyi yajcyrra wechanarráatj fi'nze', wej yujva ewmée yu' yajcymée.

⁵ Macedonia quiwete pa'jii le'chcuërráa yujva jycaasewa'l j'ipjumeetj. Quijva jyucac tjëysarrarráa vyaa, andy pecüjnisu yu' mteeva jyuca. Atsesawe'sh yacj pdyi'puwa'ljva j'ipjutj, sa' üusteva üucj yaacywa'l casejc. ⁶Nava Tito pa'pja'ga Dyusa' andya's cviisha'cj, ñusna üsteva. ⁷Nava Tito yacj puuty uypa'garráa andya's tyã'wë wecha en pa'jme'. Tito' andy tashte seena' wala wechana pa'cj, i'cue'sh ew yũuya' yaacypa'ga. Sa' pta'shcu tyacue wala äjmée yũurrava indy yacj wechaya' puuty uy wëje'ty jïnisac wejy wala cviisha'lj.

⁸ ¿Quijya'qui'tj i'cue'shtyi juuna' we'wena tyã'wë carta fi'j? sũjna wala cuj yajcytju tyãa ensu yu'. Nava ächja' tyã'wë yaaqui'tsmeetj. Nyafii yu' tyã'wë yaacyajni' tyãa carta' i'cue'shtyi wala cyüusu'cj manz en yu'. Tyagachjïrráa juuna' we'weni's cuj yajcyrra', ächja' andya' wecha'tj. ⁹Nava i'cue'shtyi cyüusu'jrra weech yajcyna tyã'wë wechatsmeetj, wejyva tyãa juuna' we'wenisa' i'cue'shtyi wala selpiic, ewmée yũuniijü caashwendu'ljna, tyãa pa'garráatj wechá'. Atsa' i'cue'sha' tyãa ñus en pa'pja'ga üuscha yajcymée Dyus dyi'pte ew fi'nzewa'ljrrá's i'cue cytey yuu. Tyãa pa'gatj andya' quimnava atsesameetj sũju'. ¹⁰Tyãa pa'gatey äjmée ne'tca'w yuu sũjna wa'lmée Dyus yacj ew fi'nzewa'lja's pacuete', ewmée yũuni's nvijrra ewte neeyüuwa'lja'scu ya'ljypa'ga'. Tyãa pa'ga ñuswa'lj entyi' atsewa'ljme'. Nava äjmée ne'tca'w yuu sũjwa'lja's yajcymeete', vituwa'ljrráac caseje'. ¹¹I'cue'sha' Dyusrráana yajcyna ne'cue tyãa ñusnisa's ajtsemée jypa'ga. Atsa' tyã'wë yũupa'ga ma'wëga ew fi'nzewa'lj casej tyã'sa' miijajcywe naata': Äjmée ne'tca'w yuu sũjna üucjrra yuwe's pjeu'ljya' yajcy i'cue, tyãa ewmée yũusa's castigäywa'lja's puuty we'wena. Tyã'wë yũurra', andy yacj puuty uyya' yajcy i'cue. Tyãasa i'cue yuuwemeesa yuu. ¹²Andya' tyãa carta's fi'jrra', tyãa ewmée yũusa's atseyajcyna tyã'wë yũumeetj, sa' ewmée yũute ñussa'sva yajcyna tyã'wë fi'jmeetj, naasáa i'cue'shtyi' wala yuj yaaqui'tj Dyus dyi'pte tyã'sa' i'cue'sh jiyucajnrráatj tyã'wë fi'lj. ¹³Tyãasatj i'cue'sh cytey yuute' wala wechawa'lja's jypa'ga.

Nava na'wë wechawa'lja's j'ipjutj tyãajü jweeírráatj wala wechawa'lj j'ipju i'cue'sha' Tito's wala ewrráa jypa'garra ewrráa ne'cue jype'ljna üsu' atsa' wechanac shawend naa pa'ga. ¹⁴Andya' Tito's cajatsrra' i'cue'shtyi we'wena: Wala ewsata' jïtj tyã' i'shiini casejme'. I'cue'sha' andy yaacyni's cytey i'cue yuu, Tito's ew jypa'gana. Tyãasa andy we'weni' bagachteva isasarrarráata'. ¹⁵I'cue'sha' ma'wëne'cue ewcuërráa jypa'garra tyajy we'weni's cytey nwëeselj tyã'wë ew yũuni's yajcyrrac Tito' jweeírráa i'cue'shtyi's wala wechá'. ¹⁶I'cue'shtyi's quijte yujva ewmée yaacywa'lj j'ipjmeetj, tyãasatj wechá'.

Ji'pjuni's wa'lmée wechana peesni

8 ¹Ächja' yacjtjël'jwe'shtyi pta'shi'tj Dyus luuch Macedonia quiwesuwe'sha' pu'chwa'lja's äate caavya'lja'jty Dyus caayaqui'tje.

²Tyāawe'shtyi' tyacue wala tjēyte fi'nzewa'lj pa'jrrava, Dyus yacj jweefirráa chjāchja fi'nzeczajncu tyā'wē yūu, tyāa pa'ga wala wechana fi'nze'ty. Tyāasaty wala ji'pjmeesarrava ūchji'ndymée pees. ³Tyāawe'sh ji'pjuni yu'sa' wa'lméety pees, sa' ma'werráava yūuna pacuerraty tyā'wē yūu. Tyā'wē yūuni's andya' ew jii'tj. ⁴Tyāawe'sh we'werra': Cue'sha' yacjtjē'jwe'shtyi pu'chya' vyuu pcjacj wēje'tja'w atsa' indya' ¿ma'jiqui'ng? jīnaty we'we. ⁵Atsa' andya' cytee pa'j yu' yuumeety na sūju'ne'tjca. Nava nyafyte' tyāawe'sh cacue yuunaty Dyus cuseté ducj Dyus jytjāasnirrá's cytey yuuya'. Tyā'wē yūurraty cue'sh ma'wē jycaatjeva cytey yuuya' yajcy. Tyā'wē yūuni'stju pta'shi'. ⁶Atsa' Tito nyafii' i'cue'sh yacj ūsrra', vyuu pcjacjya' tacjcu tyā'sa' pcjacjna cāaja'cjan Tito's neewe'wetsstju qui' yuja' naa pa'ga. ⁷I'cue'sha' quijteva jyuca ājāsa i'cue Dyusrrāana yajcyna, wa'lmée caapiya'jna, wala jiisa i'cue, dund pa'pchuwa'ja'sva nwēese'jna andynava ajtsemée peeygāasa i'cue. Tyāasa pu'chwa'lj vyuu pcjacjwa'ja'sva tyā'wēy myūuwe.

⁸Juuna' jycaajna tyā'ji'tsmeetj, naasáa vitesa pa'pchuni's jiyurra', i'cue'shva isa peeygāja'tsrra', tyā'wēy pu'chjivá'cue sūjrrarráatj tyā'jī'. ⁹I'cue'sha' peecy jii i'cue cue'shtyi jype'jsa Jesucristo peeygāani's. Tyā' ji'pjsac yu', nava cue'shtyi wala peeygājrra ji'pjmeesac yuu, tyajy ji'pjuni's cue'shtyi ūsya'.

¹⁰I'cue'sha' jū'na añutey pu'chya' tacji'cue, nava jycaatjerráa tyā'wē yūumée, peecy yuu i'cue tyā'wē pu'chya' yajcy, atsa' tyā'wē yūunisa' ewsa yuja' jīnatj yu'cypeje' andya'. ¹¹Nyafii'va ma'wēcue wechana peesna ūsu' i'cue'sh ji'pjuni yu'sa', āchva tyā'wēyrráa myūuwe cāaja'pjcach. ¹²Tyāa pa'gatey ma'wēcue'rráa ji'prrava, wa'lmée wechana peesni's Dyusa' jypa'ga'c. Dyusa' jiaa', ji'pjmeeteva.

¹³Tyā'wē i'cue'sha' vitesaty pu'chte', tyāawe'shrráa peejimée fi'nzete', i'cue'sh yu' ji'pjimée tjēyte fi'nzeczajncu tyā'jī'tsmeetj. ¹⁴Puuty ya'pu'chna ja'ndarra'j peejimée fi'nzeczajntju tyā'jī'. Āchj naa ensuy yu' i'cue'sha' quijva ji'pji'cue vite peejina fi'nzesaty pu'chwa'lj. Nava vite ensu' i'cue'sh ji'pjimée peejina fi'nzetspcachja', tyāawe'sh i'cue'sh peejini's pu'chjityna. Tyā'wē yūuna puuty peejimée ya'fi'nzena. ¹⁵Tyā'wē puuty pu'chwa'ja's pta'shrrac Dyus librate na'jī': Wala pcjacjteva quijyaame', sa' le'chcuée pcjacjanava peejime' jī'c.

Tito yacj vite caapi'qui'jrra caajni

¹⁶Dyusa' Tito's caayaqui'jne' andy na'wēy i'cue'shtyi's peeygāawa'ja's. ¹⁷Tyāa pa'ga āchja' i'cue'shtyi's tjengya' yuja' quimva jycaajmeete, tyajy ūuste peeygāawa'ja's yajcyrra, sa' andy neewe'weni's cytey yuuya' yuja'.

¹⁸Tito's pi'cyna teech yacjtjē'j cajatstju. Tyā'sa' Dyus luuch msuuwe'shva wala neewe'we'ty Dyus yuwe's wala pta'sh pu'chsa' jīna. ¹⁹Sa' tyā'werráa neewe'wemée, tyāa yacjtjē'ja's tyjityjtyi. Na'wē

Dyus dyi'pte cselpi'ji'l'jwa'l'j vyyu pcjacjna ũstja'w tyā'sna andy ducjya' Jerusalenna u'juetste pi'cyna u'l'jwa'l'jsa jīrraty tyjityj. ²⁰ Andya's ewmée nuywe'wewe'shte, tyāa yacjtjē'ja' andy yacj ja'nda yuuwa'l'jsa', na'wē peeswa'l'j pcjacjna ũsta' tyā'sna jyūna u'juetste. ²¹ Quījteva jyuca ewrráa yūuya' ũstju, Dyus dyi'pterráamée, nasaa dyi'pteva tyā'wēy.

²² Titowe'sh tyāa e'nzsarráamée, vite yacjtjē'ja'sva cajaststju, tyā' ew yūuwa'l'j yu'sa' quījteva jyucac pa'p'chuna fi'nze', sa' āchja' i'cue'sh yuutyi'sa' wejycu wala tjaacue wechana yaaqui'. ²³ Tito cytee pa'tje', i'cue'shtyi pēyiváatyna ¿Tito' quimna? jīna, atsa' Pablo yacj mjīi pu'chsa' ayte cue'shtyi selpisáa jīne'cue. Meerrava vite yacjtjē'jwe'shtyi vāa ¿quimtyna? jīna pēyityna atsa' Dyus luuch neewe'werra caajnisata', Cristo's selpisáa jīne'cue. ²⁴ Āchja' i'cue'sh peeygāani's āate mcaavya'ja'l'jwe tyāa yacjtjē'jwe'shtyi ew jy'pa'gana, cyaj Dyus luuch vite ajsu pcjaacjesawe'shva i'cue'sh peeygāani's jiyutyna, atsa' i'cue'shtyi andy we'werra': Ewsata' jī'tj tyāava cytey casejena.

Yacjtjē'jwe'shtyi pu'chwa'l'j vyyu pcjacjni

9 ¹ Dyus yacj fi'nzesa yacjtjē'jwe'shtyi pu'chya' vyyu pcjacjwa'ja's i'cue'shtyi caayaqui'l'jna fi'l'jwa'l'j peejymeena súju'tj, ² tyāa pa'gately i'cue'sha' quījteva wa'lsameeteva jīitj. Tyāasatj Macedonia quiwesuwe'shtyi'sa' wechana na'l'jīna pta'sh: Acayasuwe'sha' jū'na ańutey pu'chya' ij ũsta' jītj. Atsa' Macedonia quiwesuwe'sh maanzcuēesava i'cue'sh pu'chya' yaacyni's jiyurra', tyāawe'shva pu'chya' yajcytyi. ³ Tyā'wēteva naa yacjtjē'jwe'shtyi' neewe'wetstju, cyaj andy we'werra': Corintotewe'sha' pu'chya' ij ũsta' jītj tyā' īshiini yuumeena. I'cue'sha' cytey yuucajtntju tyā'l'jī'. ⁴ Tyā'wēme', Macedoniajūwe'sh maafīa' andy yacj ja'ndatey yuusa' i'cue'sh cytey yuumée ũsiyna cpaaquityna, atsa' wala tjaame yujna i'cue'sh tyacue wala pu'chya' ũsta' jīnisa tyā'wē cytey yuumeete'. ⁵ Tyāa sújrratj naa yacjtjē'jwe'shtyi yatste caajya' yajcy i'cue'sh tashna, atsa' tyāawe'sh pa'l'jrra' na'wē pu'chwa'l'j pcjacjya' yajcy i'cue tyā'sa' pcjacj pu'chna jyā'cjan. Cyaj i'cue'sh wala pcjacjya' neeyūui'cue tyā'sa' ũchji'ndymée cāaja'l'jane'cue, macue peeswechteva.

⁶ I'cue'sha' peecy jii i'cue: walamée mjīite', ũ'va wala meec caseje'. Nava wala mjīite', ũ'va tyā'wēy walac caseje'. ⁷ Teechsa na'wērraj i'cue'sh ũuste macue peeswechte', tyā'srráa cytey yuuwa'l'ja'. Wa'l'na tyā'wē yūuwa'l'jme', tyāa pa'gately Dyusa' peeygāja'c ũuste wechana tyā'wē peessa's. ⁸ Tyā'wē yūute', Dyusa' peejimée ũsna nes yuuna i'cue'sh peejini yu'sa' jyuca. Tyajírráa i'cue'sha' vitesatyva ũchji'ndymée wala pu'chya' ājāne'cue. ⁹ Tyā'sna we'werrac Dyus libroute na'l'jī':

Ji'pjmeesaty wa'lmée wechana pu'chsa's tyā'wē ew yūupa'ga,
Dyusa' peejymée ũsna nes yuuna jī'c.

10 Uujwal'j fiwa's Dyuscu ūsu', sa' tyāaírráac cbuucha'jna nuywalá'. Tyāa pa'ga i'cue'sha' ū'wa'ja's peejymée jyuca uyrra', vitesaty peeswa'ja'sva wala uyuune'cue. 11 Tyā'wē yūute!, i'cue'sha' quíjquíjva jil'pjsa yuurra wa'límée pu'chya' ājane'cue. Atsa' i'cue'sh ūchji'ndymée peesya' pcjacjni's cue'sh jyūna u'tje!, jypa'gasa yacjtjē'jwe'sha' Dyusa's wechaatyna. 12 Na'wē yacjtjē'jwe'shtyi pu'chwa'j cajastja'w tyā' tyāawe'sh peejinirrá's selpiwa'jsame!. Tyā'wē yūupa'ga tyāawe'sha' Dyusa's wala wechacajn tyā'wē pu'chjstja'w. 13 Na'wē pu'chnisa's tyāawe'sha' jypa'garra', Cristo jycaajni's nwēese'jsa yuj yu'ta sūjna jiyutyna, tyāasa Dyusa's tuutje'jna wala wechaatyna, tyā'wē i'cue'sh wa'límée peesya' pcjacjrra tyāawe'shtyi peesna vitesatyva peespa'ga. 14 Dyus pu'chte i'cue'sha' tyā'wē ew yūupa'ga, tyāawe'sha' iiméj wala wechana Dyus yacj puuty we'wetyna i'cue'sh pa'gate. 15 Dyusa's iiméj wala wecha'tja'w tyajy Nchi'ca's yuu cue'shtyi peespa'ga.

Pablo juuna' jycaajwa'ja's Cristo ūsni

10 1 Andya' Cristo na'wēy wala peeygājna i'cue'shtyi we'we'tj, andya's atsewe'wena na'jī'i'cue tyā'sna: Pablo' cue'sh yacj ij ūsrra yu' ma'jīme!. Nava jyu'j tyuteeyā'jrra', wala juuna' we'wena jycaaja'c jīna i'cue nuywe'we!. 2 Andy i'cue'sh tashte pa'jrra maafityi's juuna' yuucajmen, andya's nuywe'wenuwe, tyā'wē Dyus jytjāasnime'scu juuna' jycaaja' jīna. Tyā'wē nuywe'wesa yacj yu' puuty pdyi'puya'rráa ūstju maa yacjva. 3 Andya' i'cue'sh na'wēy nasarráa yujtj. Nava andya' naa quiwetewe'sh na'wē puiiya' ūsmeetj. 4 Cue'sha' naa quiwete puinisa yacj pui'tsmeetja'w. Dyus caaūusutje'jnisa yacjtja'w pui!. Tyāasa ewmeesa yu'sa' macue seena' walasateva cnaywa'jsatja'w. 5 Tyāasatja'w cnayu' Dyusa's jiyucajmen yupsa yu'sa' ma'wēsatyva, cue'sh ūus yaacyni yu'sa' nwēese'jmée, Cristo caaūusutje'jnirrá'stja'w cytey yu' Cristo's nwēese'cjan. 6 Sa' i'cue'sh yu' ew yā'j nwēese'tjeva, maafí yu' nwēese'jmée ūssatyi's maatyva castigāyya'rráa ūstju.

7 I'cue'sha' āacjēwe'shrrá's i'cue tjengu', tyā'wē maava Cristo's selpisatj sūjna yaacysa', andynava tyā'wēy Cristo's selpisana sūjna yaacywa'jna. 8 Andya' juuna' jycaajwa'jsatj jīna we'wena nestju yu', nava tyā'jpa'ga tjaamewa'j yu' jil'pmeetj. Tyāa pa'gatey Cristoc tyā'wē iiviitumée wejyva juuna' jycaajna yu'cypejwa'ja's andyna ūs, i'cue'sha' Dyus yacj chjāchja fi'nzeczajn. 9 Atsa' ūucjajncu carta juuna' fil'jrra caja' sūjna yaacynuwe. 10 Sa' i'cue'sh we'werra!: Cartate yu' wala juuna' we'wena fil'ja'c, nava puuty pdyi'purra yu', jycaajwa'j yu'sa' āja'tsme' jī'i'cue. 11 Nava tyā'jisa' jypa'yaquina, ma'wētca jyu'ju ūsrra, juuna' we'wena carta caja' na', tyā'sa' cytey yu'nja i'cue'sh yacj puuty uyna pa'jrra'.

12 Wala mjīisatja'w jīna weech we'wesa yacj caaja'nda'jna ūs wēemeetj. Tyāawe'sha' iiméj wala jiimeeta!, tyāasaty vitesate tjaacue mjīisatja'w jīna fi'nze!. 13 Andya' tyāawe'sh na'wēy vitee mjīinisu iweech we'wena fi'nzewal'j

ji'pjmeetj. Andya's Dyus mtee pa'lj mjiina pecüjwa'ja's üsuna cytee pa'lj mjiiwa'jsatj. Tyä'wërra írráatj andya's Dyus caatje!, i'cue'sh tashteva pa'lj. ¹⁴Tyä'wë andy pecüjwa'jmeesu yu' u'jmée üstju na!, i'cue'sh tashsuva andy pecüjwa'jmeevats yu!, i'cue'sh yacj üsya' nyaffi pa'jwa'jmée ne'tca yu!. Nava i'cue'sh tashsu andy pa'jwa'cj yu!, tyäa pa'gatj Cristo caapiya'jni ewsa's i'cue'shtyi pta'shya' andy nyafyte pa'lj. ¹⁵Tyäasa andya' vitee mjiini's iweech we'wena üsmeetj. Tyä'wë we'wemée wejyva Dyus pu'chte!, jweefírráa i'cue'sh yacj wala mjiiya' äja'nja, i'cue'sha' jweefírráa Dyusa's jiyucajn süju'tj. Nava Dyus mtee pa'lj mjiicaatje!, cytee pa'jrráa. ¹⁶Tyä'wë yüurra tyäa e'su' vite ajsuva caseje'nja Dyus yuwe ewte nviitwa'jsa's pta'shna. Nava vitee mjiinisu yu' iweech we'wena u'came'nja süju'tj.

¹⁷Andy'tju mjii jina we'wepcachte, wejyva Dyuscu mjii süjnarráa wechana fi'nzewa'ja'. ¹⁸Tyäa pa'gatey iweejch we'wesa tyä'wë Dyus dyi'pte ewsa caseje'tsme!, naasáa Dyus we'werra tyä' ewsa' jínisa yuurráa ewsa'.

Cristo caajnisatja'w jina íshiina u'jsa

11 ¹Andya' i'cue'shtyi yu'cypejya' shiingu'ne'tjca, nava tyäaty'i mwantaíwe. Macue äja'tsmeevá'ntca, nava ächva mwantaíwe. ²Andya' i'cue'shtyi' Cristo tashu wej yujva tyutee jytjáasu'tsmeetj. Cna'sava ma'wëga teeche yacj yuurráa imi'rra fi'nze!, tyä'wëy i'cue'shtyi' Cristo yacj yuurráa caafi'nze'jya'tj neeyüu Dyus dyi'pte. ³Nava echtjé'ja' nyaffiiva ma'wëga Eva's íshii, tyä'wëy ächva i'cue'shtyi's íshiijaváana, atsa' Cristo yacj tyacue ew fi'nzetsrrava tyuteevá'cue süjrratj üucju!. ⁴Tyä'wë yaacyajni' i'cue'sha' wa'lmée jypa'gana üsi'cue andy pta'shi'tj Cristo caapiya'jni's tyä'wëmée fiy pta'shsaty. Sa' nyaffi jypa'gai'cue Dyus Espiritu's tyä'wëmée fiysanava wa'lmée wechana jypa'gana üsi'cue. Tyä'wëy Dyus yuwe ewte nviitwa'jsa's nyafii wëse'ji'cue tyä'wëmée fiysateva wa'lu'tsmeei'cue. ⁵Tyä'wë fiy caapiya'jsawe'sha' Jesus jycaajnisáa walasatja'w jít'y, nava andya' tyäawe'shte äjmeecuesa ne'tca süju'tsmeetj. ⁶Andya' we'weya' yu' äjätmeene'tjca, nava andy üuste yu' wala jii'tj. Tyäasa írráatj andya' i'cue'shtyi' äate caajiyu'ju' andy jiyuni's bagachteva. ⁷Tyä'wë i'cue'shtyi' cchjäachja'jya' süjrra, i'cue'sh yuutyi's vyyu pëjymée andy vyyu yacjtju fi'nze! Dyus yuwe's pta'shna. Sa' tyä'wë yüurra!, ewmeevá'ntca yuucy. ⁸I'cue'sh yuutyi' vyyu tjääsmée, wejyva Dyus luuch vite ajsuwe'sh andyna peestyi tyä'snatj i'cue'sh tashte caaselpi'ji!. ⁹Sa' i'cue'sh tashte üsrra!, andya' peejiirrava i'cue'sh yuutyi' maa yujtyva tjääsmeetj. Andy peejini's Macedoniajü yacjtjé'jwe'shtyi pees. Tyä'wëtj wala jypa'yacy fi'nzena üsu' i'cue'sh yuutyi's maa yujtyva tjääsmée, sa' i'cue'sh yuutyi's tjääsme'nja bagachteva. ¹⁰Andy üuste isa yajcyrra we'weni's Cristo' jiia!, atsa' Acayasuwe'sha': Pablo' tyä'wë vyyu tjääscu jiyá' äjameetyna. ¹¹Cue'shtyi ajtserrac Pablo' tyä'wë we'we' süjuvác'ue. Nava tyä'wë yüumée, i'cue'shtyi wala peeygáa'tj tyä'sa' Dyusa' jiia!.

¹²Nava na'wětj vyyu tjäasu'tsmée na' tyā'wē yūuna nes yu'nja, andyva ma'wētca quījva tjäasmée Dyus yuwe's pta'shna ūsu' atsa' tyā'wēy tyāawe'shva quījva tjäasmeetja'w jīya' ājāmeetyna. ¹³Tyāawe'sha' Jesus jycaajnisatja'w jīna īshiinisa's isasa na'wē we'wena u'jusarráata'. ¹⁴Tyā'wē yūuni's fiy yuj yuune'ta sūjna yaacywa'j ji'pjmeetja'w, tyāa pa'gatey echtjē'j seena'sa yujrrava angel ewsa na'wē yuurrac vya'. ¹⁵Atsa' cjayt echtjē'ja's selpisaava tyā'wēy ewmeesarrava ewsa na'wē yuurra vya'. Nava tyā'wē ewmée yūuna fi'nzepa'ga vituwa'ja's ji'pjutyna.

Cristo caajnis Pablo pytjaa yuuna fi'nzeni

¹⁶Andya' na'ji'tj na': Luucumeetj, nava tyā'wēteva luucuna sūjna yaacysa yacj yu' luucu na'wēyrráava qui' we'weya'vatj: ¿Andyrráa quīj yūurra iivejch yaacywa'ja's ji'pjmée yuuqui'tj? ¹⁷Iivejch we'wenisa' Cristo jycaajnisameeta', naasáa luucu yuusáa we'wenisarráata'. Tyāa pa'ga andya' luucu yuusáa we'wenirrá's we'weya'vatj. ¹⁸Naa quiwetewe'shrrá's jiirrava nacue wala iivejch yaaqui'ty atsa' andyva iivejch yaacywa'j ji'pjne'tca. ¹⁹I'cue'sha' tyacue wala jiisatja'w sūju'i'cue nava luucu we'wesa yuutyi' jiyumeei'cue nwēese'je'. ²⁰Tyāasa i'cue tyāawe'sh juuna' caaselpi'jini's wa'lu'tsmée, īshiirra vyyu cusa'ja'ty, sa' i'cue'shtyi iiyamurra ajtsenaty jypel'je' uyiina. ²¹Nava andya' tyā'wēy juuna' yuuya' ājāmeetj, atsa' tjaame yuja' nava pta'shi'tj.

Nava vite tyā'wē yāl'j iivejch we'wetste', andyva tyā'wēy luucu we'weni's we'wewa'j ji'ptju. ²²Tyāawe'sha' hebreowe'shtyna, atsa' andyva tyāatj. Israelwe'shtyna, atsa' andyva tyāafirráatj. Abraham ji'ljtyna, atsa' andyva tyajūjywe'shtju. ²³Cristo's selpiisaatja'w jī'ty, atsa' andya' tyāawe'shte wejy jytjaacue selpiisatj. Tyā'wē iivejch we'wenisa' luucu yuusáa we'wenirrá', nava we'wetstju. Andya' tyāawe'shte jytjaacue mjiisatj, tyāawe'shte jytjaacue pcyuunisatj, carcelte maanzcuēe usva cyuupjnisatj, maanzcuēe usva uuwa'tjerráa yāl'j fi'nzesatj. ²⁴Andya's judiwe'sha' tajts us castigāyrra' treinta y nueve ājpcachtyi pechujcue. ²⁵Tecj ustju pāpani yuu. Teech ente' cuet wāatatajrra icje'dyijty. Tecj uscu andy u'jni barco' icj dyiicjē cjee. Vite ente' teech cus pe'te teen utatj icjsu pejndna u'ju'. ²⁶Iiméj wala pecūjsatj, yu'wala seena'suva ctejcana, peswée icj wēeni, andy nwe'sh íiva icj wēeni, maava tyā'wēy yūu wēeni. Chjamsu ma'c yuu, meerra' dyi'tje ma'c yuu, meerra' ícjte ma'c yuu, nava tyā'wērrarráatj ūucj ūucjte fi'nzena ūsu'. Yacjtjē'jwe'shtja'w jīna īshiisava icj wēeni yuurráatj u'ju'. ²⁷Mjiina ñustetj fi'nze'. Maanzcuēe cusva dejmeetj u'juwa'j ji'pju', pytjaa wēena, yū'wēena, ū'wa'j uymée maanzcuēe usva u'ju'tj, ropa ji'pjmée cumana pytjaa yuuna.

²⁸Tyā'wē ñuste fi'nzenisarráaty ji'pjumeetj. Dyus luuch msuuwe'shtyiva jyuca peeygājna yaacywa'ja'sva een isatj ji'pju. ²⁹Maava Dyus yacj chjāchjamée fi'nzetste', andy yuu tyā'wē yuuts na'wētj yaaqui'

tyāawe'shtyi peeygājna. Maaíityi's pcalte cweetel'jetste', andy yuu tyā'wē pcalte weteets na'wētj yaaqui' tyāawe'sh pa'gate. ³⁰Andya' iwejch we'weya'varra', wejyva andy pytjaa yuuna fi'nzetste Dyus pu'chcu tyā'srráana yaacywa'lj ji'ptju. ³¹Bagachteva tuutje'ljni fi'nzewa'ljsa cue'shtyi jype'ljsa Jesucristo Tata' jiia' andy íshiimée isa we'weni's. ³²Vite ente' andya's na'wēty yuu: Damasco chjambte úste', Aretas jycaajna úsni quiwete ne'ljue'sha' chjambte u'cani vityte andyna tundwa'ljsa tyajc. ³³Nava andya's canastate acjrra ventana murallacjety spajcy. Tyā'wē yūurratj iyu ewmeesa cusejü.

Cristo caavya'ja'ljni's uyni

12 ¹Peequírráa iwejch we'weni yacja' quíj yujva ewsa ya'cutyi'ji'tsme', atsa' wejy yuuva Cristo caavya'ja'ljni's uynírrá's we'weya'vatj. ²Catorce añu yuutsa' tyāa ensu' teeçh pitstjē'lj Cristo's nwēese'ljsa's tecj cielute cājpcach jyūna u'ljnic yuu tyāa pitstjē'lja's jiitj. Tyā'sa' pety cacue ma'c jyūna u'ljni yuu, meerra' cacue ji'pjmée ma'c jyūna u'ljni yuu nava Dyusrráa jiina. ³Ma'wēne' yuu cacue ji'pj ma'c jyūna u'ljni yuu, meerra' ji'pjmée ma'c jyūna u'ljni yuu tyāa yu'sa' jiimeetj, Dyusrráa jiia'. ⁴Nava jyūna u'ljni yuj yuuc Dyus úsnite pa'lj. Atsa' cyteea' we'weni wēse'cj, quim yujnava pta'shwa'lj meea's. ⁵Tyā'wē yūunisarrá' iwejch yajcyya' ya'ájayujuna. Nava iwejch we'wena ús wēemeetj, naasáa andy pytjaa yuuna fi'nzenírrá's yaacywa'lj ji'ptju. ⁶Andy iwejch we'we wēevats yu', tyā' íshiinisamée yuj yuuna, tyāa pa'gatey isasarrá'scu ya'we'we' naa pa'ga. Nava tyā'wē yu' iwejch we'we'tsmeetj, cyaj maa yujva andya's tjaacue walasana sújna yajcymeetya andy fi'nzeni's uyna wēse'ljrrava. ⁷Tyā'wē Cristo caavya'ja'ljnisa' iiméj seena' wala zhichcuesa yu', atsa' tyāaty jiyurra andya' iwejch yaacywe'shte, andy cacuete seena' wala acasa caapa'ja'ljnitj yuu, echtjē'lj caajnis. ⁸Atsa' Cristo's tecj usva pējytju tyāa aca's caycase'cjan. ⁹Nava Cristo' na'wērráac pas: Peeygājrra andy pi'cyna úsni wejy tjaacue ewsa', tyāa pa'gatey chjächjameesafírráa andy pu'chni's jypa'gawa'ljsata' jī'c. Tyāa pa'gatj wechana fi'nze', aca yu' casemeeteva, Cristo' andya's peeygājrra pu'chna nes yuuna sújna. ¹⁰Tyāa pa'ga andya' wa'lu'tsmeetj, chjächjameecuē fi'nzeni, wēeshuni, peejiina fi'nzeni, yajtsena fi'nzeni, Cristo's selpiipa'ga tjēysa pa'ja'ty tyāaty, tyāa pa'gatey naa cacuete jwee írráa ñuste chjächjameecuē fi'nzetsrra yu', jwee írráatj Dyus yacj chjächja fi'nze'.

Dyus yacj fi'nzesa Corintotewe'sh ewmeeváa fi'nzena ústyna sújrra Pablo cuj yaacyni

¹¹Luucu na'wētj peequírráa weech we'we, nava i'cue'sh jiyucajncu tyā'wē we'wewa'lj casej. Andya' Dyus dyi'pte yu' ájmeecuesarrava, na'wē Jesus jycaajnis walasatja'w jī'ty tyāawe'shte yu' ájmeecuesameetj. Tyāa

pa'ga i'cue'sha' andy ju'ngu yuuwa'jsa i'cue yu'. ¹²Tyãasatj andya' i'cue'sh cshavyte selpiina úsrra', quĩjteva wantäyna quĩjquĩjva caavya'ja'tj quim yujva ewunimeesa iiméj wala zhichcuesaty. Tyã'wë yūunisaty caajiyu'jsa yu', andya' íshiimée Jesus jycaajnisateva. ¹³Dyus luuch vite ajsuwe'shte tjaacue äjmeecuesamée i'cue, nava andya' peeygäjrratj i'cue'shtyi's pu'ch tjãasmée. Tyã'wë i'cue'shtyi quĩjva tjãaspa'gamée ìmpeltunaíwe!

¹⁴Ächja' i'cue'sh tashna pa'jya' yuuwa'ja's pjeu'jrra ji'ptju naa yacja' tecj us yujya' yaaquitstju. Nava i'cue'sh yuutyi's tjãasme'nja, tyãa pa'gategy i'cue'sh pu'chwa'jsamée i'cue, wejyva i'cue'shtyi andy pu'chwa'jsatj ney na'wë. ¹⁵Tyãa pa'ga andy ji'pjuni yu'sa' jyuca úsu'nja, andy ityi fi'nzeniyä'jrra, i'cue'sh úustyi vitu jytjãasmeerra. Tyã'wëtj andya' i'cue'shtyi jweeírráa peeygäja', naapcachja' i'cue'sh yu' andya's jweeírráa i'cue atse'.

¹⁶I'cue'shtyi andy quĩjva tjãassameete jiirrava, maái yu' na'wë i'cue we'we': Tyã'wë äate yu' quĩjva tjãasmeerrava, ma'wë cutyi'jwa'ja'sva jiic yu', tyãasarráac quĩjva pëjymée ji'i'cue. ¹⁷Tyã'jicajna', na'wë Tito yacj teech yacjtjê'j i'cue'sh tashna nyafyrraj caatj, ¿tyagach vá'ntca i'cue'shtyi' íshiiya' yajcyrra caaj? ¹⁸Tito's i'cue'sh tashna nyafyrraj caja'tsrra', vite yacjtjê'j caapi'quij'rratj caaj. ¿Tyän ente vá' Tito i'cue'shtyi íshii? Andya' Tito yacj teehsa na'wërraj ew yajcynarráa fi'nzesate ¿jiimeevá'cue?

¹⁹Cue'sh dyi'pte ewte neeyúu wëerrarráac tyã'j' sūjyuvá'cue, nava tyã'wëmeetj, wejyva Dyus dyi'ptetj we'we' Cristo jycaajnírrá's, cyaj i'cue'sha' Dyus yacj jweeírráa chjächja fi'nzewa'ja's uyuune'cue, andy yacjtjê'jwe'sh yaacynisa. ²⁰Tyã'wëme', i'cue'sh tashte pa'jrra', andy jycaajnime's váa uyu'nja. Sa' peeygäjna pa'japcachte, juuna' yuuwa'j váa casejena sújte úucj yuja'. Tyã'wë andy pa'ja'tste', i'cue'sha' puuty puina, vitee ji'pjunity atseyajcyna, úusachana, puuty tyuteena, yuwe susna, e'sgarráa atsewe'wena, iiwejch yajcyna, ewmée váa fi'nzena ús yuune'cue sújtec úucj yuj yu'. ²¹Sa' i'cue'sh tashna yujya'vatj tyãa ente' i'cue'sh pa'gate andya' Dyus dyi'pte tjaamewa'j ji'pjuvájna sújrra úucju'tj. Tyã'wë i'cue'sh tyacue tyachteva pcal canzhsate írráa fi'nzena úste uyna pa'jrra', wala ñusna ú'newa'j ji'pju'nja sújrratj tyã'wë úucj yaaqui'.

Yu'cypejna yuwe wechaa caajni

13 ¹Naa yacja' tecj us i'cue'sh tashna pa'jya' yuuwa'ja's yaaquitstju. Cytee pa'jrra', quĩj yuwe's pjeu'ju'tsrrava, jiisa e'nz meerrava tecj tyajrra yuuwesa's castigäywa'j yuuna. ²I'cue'sh yacj cytee nyafii úsrra', jypa'yacy fi'nzeczajni dyiicjey we'wetj pcalte fi'nzesaty maatyva na'jina: I'cue'sh tashte qui'quin pa'jrra', peltunaime'nja jini's ächja' qui' caayaqui'jitstju nee jyu'tje úsí. ³I'cue'sha' andya's jiyu wëena úsi'cue Cristo caajnisadyijteva, tyã'sa' andy pa'tje jiyune'cue. I'cue'sh äjmée yūusatyi's Cristo' juuna'meecué jycaja'tsme', tyãasa tyajy juuna' jycaajni's

i'cue'sh cshavyte caavya'ja'jya' ũsa'. 4Tyā' naa quiwete chjächjameecuẽ fi'nzesa na'wẽ yuj cluuste fyutsni uuc, nava ityĩ yuuc seena' chjächja yuuwa'ja's Dyus ũste. Andyva tyāa na'wẽy naa quiwete chjächjameecuẽ fi'nzeni's ji'pjurrava, tyāa yacj fi'nzerra', Dyus cchjäachja'jnitj fi'nze' i'cue'shtyi yu'cypejwa'jsa.

5Tyāa pa'ga ¿ma'wẽ ũscytja'w? sũjna meswe, aan Dyus yacj fi'nzena ũsne'cue. Īshiisamée Dyus luuch dyijrra', ¿Jesucristo's ũste ji'pjcue'? 6Jesucristo's ũste ji'pjdijrra', andya's ew jiyune'cue, Dyus luuchtju jīna isatj we'we' naa pa'ga. 7Tyāasatj i'cue'sh pa'gate Dyus yacj puuty we'we', quĩjva ewmée yūuna fi'nzeczajmen. Andya' ishiirra tyā'ji'tsmeetj, naasāa i'cue'sh ewrrāa fi'nze jytjāasrratj tyā'jī'. Andya' ĩshiisa na'wẽ vántca, nava tyāa yu' quĩj yuumeena. 8Tyāa pa'gatey isasa's cytey nwēese'jwa'jrrāa ji'ptju. 9Dyus yacj i'cue'sh chjächja fi'nzetste', andya' wecha'tj. Andy yu' chjächjameecuẽrrava, Dyus yacj puuty we'wena nes yu'nja, i'cue'sha' Dyus yacj chjächja fi'nzeya' ājācajn. 10I'cue'sh tashna yujmey, naa carta's fi'jrra yatste cajastju, cyaj andy pa'jrra', i'cue'shtyi juuna' yuuwa'j ji'pjume'nja. Tyā'wẽ juuna' yūuwa'ja's Cristoc andya's neewe'we, i'cue'sha' Dyus yacj tyutemée jweefirráa chjächja fi'nzewa'ja's ji'pjucajn. I'cue'shtyi wejy yuuva cchjäachja'jnatj tyā'wẽ yū'.

11Áchja' yacjtjē'jwe'shtyi neewe'we'tj ewrrāa fi'nzeczajn. Quĩjteva jypumbamée fi'nzewa'jrrá's mpaacuewe. Cviisha'jni myūuwe. Cyteerraj zhichcue puimée mfi'nzewe. Atsa' ew caafi'nze'jsa Dyusa' i'cue'sh yacj nes yuuna peeygājna. 12Ūusuj jyuca yajcyrra puuty teechna na'wērraj yuwe mweechawe. 13Dyusa's jiisa yacjtjē'jwe'sh jyucaysaty yuwe wechaacaja'.

14Dyus yacjrrāa mfi'nzewe. Jesucristo pu'chjina, Dyus Espiritu yacj tyutemée fi'nzeczajn.